

55638
0422

v.9

四方

治道

災異

廿二

禮

辭受

學

文學


論事

政弊

記言

卷之八

BERKELEY
LIBRARY
UNIVERSITY OF
CALIFORNIA



記言卷之四十八 續集

四方二

南北道風土誌

安邊唐時靺鞨既并沃沮寔定理安邊二州定
理州後世因革無傳安邊州高麗改登州誌曰
在宜州南宜州今德源府安邊之名最舊遠今
為安邊都護府

北界之地鐵嶺以北至豆滿江千里古沃沮之
域或曰置溝婁東濱淳海自挹婁南至獺貊又
有東沃沮又南沃沮在獺貊之外漢之滄海郡

也挹婁肅慎氏之別名

高麗初定女真拓地浸廣以鐵嶺為界女真蘇
靺遺種高勾麗部落睿宗二年遣尹瓘吳延寵
擊逐女真至先春嶺立石記功以為界置九城
曰咸州今咸興府曰英州在蒙羅骨下曰雄州
在古州火串嶺下曰福州古禿魯元今端川郡
曰宜州在定州南公嶮鎮在會寧府蘇下江濱
女真強四年悉還其地後柳仁雨復置和登長
定預高文宜八州後又没于元恭讓二年我
太祖定北邊至豆滿江置孔鏡吉端青洪河七

州

太祖七年以斡木河國祖王跡所基置慶源府
後女真寇邊移府於蘇多老女真復入寇又移
府於富居增置寧北鎮於石幕以為塞

斡木河後為董孟哥帖木兒所據兀狄哈擊滅
之

世宗十六年以金宗瑞為都節制使復孔鏡古
地移寧北鎮於伯顏愁所斡木河西北當賊路
之衝而斡朶里遺種所居置大鎮以塞北門復
置慶源府於會叱家增等孔州古邑城以豆滿

江為界

幹木河胡語吾音會直豆滿江南今會寧府會
叱家今慶源府石幕富居今富寧古邑名石幕
今富寧府龍城古鏡州北境寧北鎮今鏡城府
其等城疏有曰龍城無山川之阻實四散之地
富居石幕皆非疆域之處賊滅之後布置城邑
為萬世之利也自虞川三江西至禿魯江萬年
自博平古和州北盡清河九百里皆肅慎氏之
地

世宗二十三年置茂昌間延虞芮慈城四郡

世祖元年罷四郡虛其地以絕胡清河以外忽
刺溫兀良哈婆豬雜種

肅慎氏東濱溱海西至寇漫汗深山之地夏則
巢居冬則穴處無牛羊畜豬食肉衣皮有邵常
木名中國有聖人為君則生其俗貴壯賤老以
無憂哀相尚有石砮楛矢皮骨之甲檀弓三尺
有五寸楛矢尺有咫周武王時貢楛矢石砮周
公旦輔成王復入貢其國東北出石砮取之者
先禱鬼神

扶餘其地連獺貊今北界肅慎之地也其俗好

勇強其法殺人者死沒入其家盜一責十二男
女淫婦入妬者皆殺之有軍事則殺牛祭天神
用其蹄占吉凶蹄解者凶合者吉史記龜策列
傳曰四夷各異卜以決吉凶此也四夷嚴祀鬼
神凶奴人祭金人大會蹄林馬韓祭蘇塗肅慎
氏先祝石砮一也

唐書曰沃沮在樂浪東肅慎氏之地出善馬貂
豹今太僕置畜牧六於和宜之間

靺鞨本粟靺鞨高勾麗別種其酋祚榮引弓數
萬并扶餘沃沮并韓朝鮮地唐開元中去靺鞨

稱渤海以肅慎古地置上京獵狍古地置東京
沃沮古地寘南京後渤海為東契丹

人事古今之殊治亂興亡之故其變無窮而風
氣俗尚人物所善所好大體無變沃沮之質樸
強悍扶餘靺鞨之喜勇強嗜欲蓋北俗同然
詔遠方政俗與其上下之志誦遠人傳道古事
辨其丘陵原隰與其山澤之名物利害而詔之
致其珍異

通其財利同其權衡度量除其怨惡

致方貢遠物厚其送逆德博而威廣者也

關西誌

朝鮮九域之地在海隅燕齊之外初無君長有神市始教生民之治民歸之神市生檀君居檀木下號曰檀君始有國號曰朝鮮朝鮮者東方日出之名或曰鮮汕也其國有汕水故曰朝汕都平壤堯立二十五年後徙都唐滅儒州有唐滅京麗史以為檀君氏之國都商武丁八年檀君歿今江東縣傳說檀君塚

或曰檀君八阿斯達不言所終

泰白阿斯達皆有檀君祠

檀君傳解夫婁為北扶餘禹平水土會諸侯於
金山解夫婁朝禹於金山氏解夫婁母非西岬
女也解夫婁禱於鯤淵生金蛙貌須金蛙命曰
金蛙解夫婁傳金蛙金蛙徙迦葉原為東扶餘
金蛙末秦并天下

金蛙悅優渚水之女感日影照身生朱蒙朱蒙
善射之名有少子溫祚朱蒙溫祚為勾麗百濟
之祖

金蛙傳帶素帶素與勾麗爭攻伐有北溟恠由
者請從擊殺帶素大霧七日餘兵猶力聞勾麗

國君無恤潛師遁歸至孫都頭降勾麗東扶餘
亡當莽之世五世二千年

金蛙之世殷亡殷亡箕子至朝鮮殷民從者五
千餘人詩書禮樂巫醫卜筮百家技藝皆從之
周武王因以封之而不臣也都平壤始至言語
不通譯而通其志重禮俗敬鬼神行八政之教
相殺者償以命相傷者償以穀相盜者沒為奴
婢欲贖者人五十萬俗猶羞之嫁娶無所售黎
民樂業民無盜門不夜扃行旅野宿平壤兔山
有箕子塚其國漢之玄菟樂浪古朝鮮地在肅

慎氏之西

至周之末世燕伯稱為王東略地朝鮮侯欲伐
燕以尊周室大夫禮諫而止六國時燕略屬朝
鮮等塞置戍又攻其西地二千餘里以滿潘汗
為界

及秦始皇帝遣蒙恬等長城至遼東朝鮮王否
懼服於秦太子準立與燕王綰約以涇水為界
守遼東古塞後為衛滿所襲破王準南奔為馬
韓箕子傳國四十一世九百二十八年馬韓又
二百餘年為百濟所并

言言卷之四
五
衛滿者燕亡人，魼結為蠻夷，服聚黨千餘，逐王
準據朝鮮，以兵威財物并古秦雲障地，拓地數
千里。二世至孫右渠，漢孝武滅之，分其地為樂
浪、玄菟。玄菟治沃沮，樂浪治朝鮮。

孝昭時，等遼東城以玄菟為東州。

弁韓，樂浪之苗裔也。韓書曰：弁韓，樂浪箕子所
封也。唐書曰：弁韓在樂浪之地。

高勾麗始祖朱蒙，扶餘國君金蛙子也。金蛙悅
優渤水之女，感日影照身，生朱蒙，以為無人道。
而生棄之馬牛避不踐，遂收之。生七年，能執射。

號曰朱蒙朱蒙善射之名長則智慧過人金蛙
有子七人忌之謀欲殺之朱蒙與烏伊摩離陝
父三人者亡至卒本扶餘因立國為君國號高
句麗其俗雜肅慎鮮卑靺鞨降松壤滅蒼人沃
沮始太當秦王政并六國之時卒號曰東明王
類利立用扶芬奴降鮮卑為屬國有臣薛支言
於類利曰尉那之地險阻土沃宜五種多麋鹿
可居遂徙居焉

無恤立攻扶餘有恠由者自稱北溟人長九尺
目有光請從無恤異而許之與餘兵戰恠由擊

殺其君帶素其衆猶力鬪圍之數重有大霧七日無恤懼而逃歸恠由死葬北溟之南麗人以時祀之

無恤既殺帶素并玄菟樂浪遂霸東夷卒號大武神王漢建武二十五年伐取樂浪地至漻水解憂立無道國人叛之為其臣所弑立類利孫官官立六十六年任用賢良國治兵強王弟遂成畔王曰我今老矣讓於遂成以絕惡聲遂成立殺前王之子為明臨答夫所弑迎立王弟伯固伯固七十七遂成子鄒安亡匿山中諸王請

罪王封讓國君伯固傳男武得乙巳素為相年八十餘明收教信賞罰國以治平當東漢之末天下大亂漢人多歸之立賑貸法春夏發粟賑之冬則收之至今州郡縣上計是也

壽王六世至王元立隋煬帝大發兵伐勾麗不利而歸乙亥文德乘其不利襲擊大破之隋敗兵至澹水無舟可渡追兵在後急有浮屠七人前徒涉隋兵從之皆溺沒麗人澹水上作七浮屠以祀之

至建武立泉蓋蘇文築長城自扶餘西南薄海

千餘里十六年而成遂弑其君建武立臧專國
政唐太宗親征勾麗詔新羅百濟奚契丹共擊
之帝降白巖城至安市城攻之三月不克遼左
早寒士馬凍死詔班師安市城主從城上拜帝
謝曰士各為其主也帝賜縑百疋

懿章元年薛仁貴為前鋒拔扶餘川中四十餘
城蓋蘇文死而其子為莫離支既勢窮遣其子
亡入唐向導滅國時彗星見於旱昴李世勣乘
勝合新羅兵圍平壤王臧降勾麗亡自朱蒙傳
二十八世七百五年

高氏國都三遷朱蒙立國卒本扶餘留利徙居尉那十世而魏母丘儉攻陷九都憂位居走保南沃沮因徙都平壤晉時王釗立還居九都壽王三世復遷于平壤至滅亡於唐

唐既滅勾麗分其地為九府四十一州百縣後為靺鞨所并置西京於清河上卒并於新羅

至高麗定疆域為浪西地今為平安道西京三州十一府二十八郡縣幅員千里其星箕其次析木西濱燕齊之海東接間延虞芮古肅慎之地北至清河清河以外古玄菟扶餘又其西遼

東古地

平壤國之西京自檀君淳庀之治被箕子之化
為有道之國自衛滿以降俗變勁悍扶餘勾麗
以善聞立國然霸王之所更居五民之所聚沮
西尚富麗多傑俊龍灣安朔中國之途物貨之
所流其利綵麻鹽鐵海錯萬年青塞以東貢麥
漆貂豹皮革之物

壤界接於禹貢冀北之地其民質實有大國之
風

耽羅誌

毛羅南海中小國幅員四百里海路九百七十里而遙

本九夷之一上古有高乙那良乙那夫乙那三人者化生為人始為生民之祖三祖之基謂之上都中都下都

高乙那十五世有高厚高淸始通新羅時有客星見新羅國君號厚曰星主淸曰王子王子者寵愛之名初二高浮海來泊耽津命國號曰耽羅後世降百濟為耽毛羅賜爵恩率後為佐平高麗太祖二十年耽毛羅遣其子末老來朝至

肅宗立滅為郡縣至元宗時耽乇羅反遣金方
慶討平之

忠烈王元年元置耽羅總管放牛馬駱駝驢羊
二十年罷總管屬高麗

高麗貢濟州牧後六年元更置軍民萬戶放
馬旋棄之恭愍王二十一年元復置萬戶府元
亡復屬高麗

洪武七年元牧子作亂自稱東西哈赤殺長吏
高麗遣崔瑩伐之盡殺之我

太祖五年置州牧判官

太宗二年革星主王子為左右都知管置旌義
大靜二縣

世宗二十七年罷左右都知管選邑俊置上鎮
撫

州在頭無嶽北北地常多北風樹木之植皆偃
向南旌義大靜二縣在嶽南南地無風多瘴霧
晝晦頭無嶽漢挈別名亦曰釜嶽在州南二十
里衆峯峯皆上有泓地勢寬平稱頭無嶽其絕
頂有白鹿泓春秋二分夕見南極老人星
釜嶽東為長兀嶽高與釜嶽齊上有深淵水旱

行禱山高五月積雪八月襲裘州東五十里長沙堆

州縣之居皆山麓海上其土皆沙礫唯州旁廣壤赤埴

其地多壽考其俗好淫祠男少女多女執男役有女丁之號

島人皮服海妻無裙布繫一尺

其穀宜黍稷麥其貨瑱珠玳瑁螺貝其魚鰕魚鮫魚望魚胎化無卵育其果橘柚橙柑梔梔產良馬

山高海惡其人業射獵漁釣不用網罟

山麓之地多石少土耕種者踏田多虫蛇蚍蜉
尺餘出香鼠

山無虎豹熊羆豺狼惡獸無狐兔鳥無鸛無鵲
無鵠鵲山中見奇禽怪鳥有貢鳥獸麋鹿豕海
獺

毛羅火脫餘鼠其間海水深黦多烈風高浪每
春夏南望水宗外高檣大馭過者無數此黑齒
之夷通中國之路亦海外諸蠻夷物貨所通西
南望白海崔溥漂海東風七晝夜至白海其外

大琉球

言言卷之四

三

記言卷之四十八終

記言卷之四十九 續集

禮一

舉保傳篇自明劄

臣側聞有黃世禎者上疏攻臣指為害正云云此盖有說焉臣於昔上疏言建儲事賈生保傳篇曰古之王者太子乃生固舉以禮使士負之有司齋肅端冕見之南郊過闕則下過廟則趨孝子之道也故自為赤子而教固已行矣周成王幼在襁褓召公為太保周公為太傅太公為太師保保其身體傳傳之德義師導之教訓置

少保少傅少師是與太子宴者也孩提有識三公三少固明孝仁禮義以導習之保傅篇雖賈生作之大抵古之遺也今春坊師傅賓客諸講官之置亦古之遺也前時殿下誕生已離襁褓之年而未有此舉臣謹以此禮上建儲之疏而疏中有國本未定之語春秋桓公六年九月丁卯子同生胡安國曰此世子也其不曰世子何也天下無生而貴者也誓於天子然後為世子故也蚤建太子所以尊宗廟也國儲大號也冊誓上儀也臣之此言嚴國本教太子之遺也

當時疏下該曹事不行而聞宋時烈頗有不悅
語臣咄咄私嘆曰彼亦讀古人之書者也而乃
不說語耶至今攻臣者以付宗統嫡統之說而
辭說累累臣不知其所謂也事在冊禮之前而
歲年且久臣竊恐 殿下或未之知也略舉前
說以上臣蒙荷大恩終無尺寸之報而怒臣者
益多臣不知所以自處也伏乞 聖明鑒罷臣
職許臣歸死田里不勝幸甚

練後無朝夕哭割

伏以臣得見禮曹回啓大臣收議從金長生之

說仁宣大妃小祥後上食有哭之議金長生
之說不知何據而考之禮經則不然既夕禮曰
居倚廬不脫經帶晝夜哭無時又曰返哭惟朝
夕哭不奠喪服小記曰無事則不闢廟門哭於
其次喪服傳曰既虞䟽食水飲朝一哭夕一哭
又曰既練舍外寢始食菜果哭無時䟽曰既練
之後無朝夕哭唯有廬中或十日或五日思憶
則哭也家禮初喪章食時上食註如朝奠儀既
虞罷朝夕奠唯朝夕哭又小祥章止朝夕哭三
年之喪止朝夕哭則無哭故令孝子之至痛許

有時而伸其哀此加隆之義也禮有奠而無上
食有始死奠有小殮奠有大殮奠有朝夕奠朔
月奠薦新有黍稷喪大記補曰朔月月半殷奠
自始死以來奠不言黍稷至此乃言之故於是
始有黍稷死者之於朔月月半猶平常之朝夕
人生則有朝夕之常食死則有朔月月半之黍
稷殷奠既大祥有四時之祭禮制有節隆殺有
漸闕廟門之禮既止哭上食猶哭則是常哭猶
在而又哀至則哭與初喪同非哀殺之節也禮
貴實無貌非所疑也先儒臣李滉曰細觀禮意

卒哭漸用吉禮朝夕之間哀至不哭惟存朝夕
哭練而止朝夕哭惟朔望會哭哀漸殺服漸殺
哭亦漸殺也若有朝夕上食哭不應曰惟朔望
會哭而臣謹歷考經傳條列以進禮莫嚴於三
年之喪見議於四方後世非細故更議於大臣
臣無任惶恐隕越之至

大王大妃服制收議

通解喪服斬衰章父為長子傳曰何以三年也
正體於上又乃將所傳重也

諸侯為天子傳曰天子至尊也周禮司服凡喪

為天王斬䟽曰諸侯諸臣皆為天王斬衰

君傳曰凡與諸侯為兄弟者服斬䟽曰謂諸侯死凡與諸侯有五屬之親者皆服斬也兄弟俱為諸侯則各依本服

齊衰章為長子傳曰何以三年也父之所不降母亦不敢降也䟽曰以子為母服齊衰母為之不得過於子為已也

大功章君為姑姊妹女子子嫁於國君者傳曰何以大功也尊同也尊同可得服其服

齊衰不杖期註天子諸侯絕旁期正統之期猶

不降故無云齊衰正統大功亦不降父母為長
子三年以先祖之正體也蓋已極無以加矣諸
侯為姑姊妹女子子嫁於國君者與兄弟俱為
諸侯者尊同尊同則服其服太后之於國君尊
同有母子之本服父為子斬以正體傳重也母
為子齊衰不得過於子為已也司服凡喪為天
王斬疏言諸侯諸臣為王斬不言母后為王斬
五服圖族祖出於高祖諸祖出於曾祖諸父出
於祖兄弟出於父子孫出於已正體之尊不係
於五屬君臣之義雖嚴父子之倫何可廢之

天子諸侯絕旁期尊同則不絕不絕則無斬此
喪服之大義也

魏晉故事皇太后三夫人已下皆為天子斬
東晉太元二十一年孝武崩李太后制三年之
服尹鑄博於禮者也言此禮矣臣有管見安敢
不盡言伏惟上裁

收議後又進劄

今以議禮事因領左相進劄有大臣六卿三司
之長會賓廳之命召牌及臣臣適有狗馬之
疾猝甚不得趨命死罪死罪臣既已盡於前

日獻議而臨問之下不得不更申數語以畢前說

儀禮喪服斬衰章父為長子斬為正體傳重也齊衰章母為長子齊衰不得過於子為己也此言長子本服

周禮司服職曰凡喪為天王斬疏曰諸侯諸臣為天王斬母后與諸侯諸臣為天王同斬未之聞也

儀禮君疏曰諸侯死與諸侯有五屬之親者皆服斬兄弟俱為諸侯則各依本服

大功章君為姑姊妹女子子嫁於國君者傳曰
何以大功也尊同也尊同則服其服以太后之
尊反下於姑姊妹女子子而不得服本服乎父
子大倫不可以同國論也三從本於高祖再從
本於曾祖從昆弟本於祖昆弟本於父子孫本
於己五屬係於正統正統不係於五屬以父母
係於五屬無此理然則本支之序亂矣天子諸
侯絕旁期尊同則不絕故服本服者無斬

太后為嗣君斬魏晉故事非三代之禮也今尹
鑄建此議臣以為不必太后為嗣君服斬然後

言言卷四
君位益尊徒取天下後世之譏而已也

昨以議禮事因領左相進劄有大臣六卿三司
之長會宣廳之命召牌再下而臣狗馬之疾
猝甚不得已扶詣闕下敢陳所懷臣既已盡於
前日獻議之日所見既定本無苟從之事亦無
更進之言臣區區所願者 聖德日躋無過於
百代之上而已臣伏見 大王大妃服制收議
東晉孝武崩李太后制三年之服宋武帝崩蕭
太后制三年之服而此亦三代之禮也臣不敢
引以為 聖朝盡禮之明証矣今承隆批不勝

惶恐之至

與希仲 乙卯

前者希仲與我面論箕子為東方禮教之祖祀於國中如祀孔子者稽之禮書則不然禮廟饗不出國顓臾有伏羲廟實沈遷于大夏晉人祀之讐序星辰以著象堯均刑法以義終未聞天下祭伏羲讐堯舜崩於蒼梧南疑有舜廟太公封於齊齊有太公廟箕子雖聖祭於國中則非類也祭非其類鬼神不歆祭孔子於學氣類之饗祭箕子則不然愚以為平壤有箕子廟平壤

言言卷之四
箕子之國宜增飾之祀以諸侯禮樂可也愚見
如此更思之幸甚

答希仲

首言父為長子者先舉長子之本服也

父為長子斬為傳重也非以父之尊降為臣服
也

齊衰章曰母為長子齊衰不得過於子為已也
何以謂非禮經之意云也

凡喪服為天王斬非并舉父母而言也

兄弟俱為諸侯各依本服俱為諸侯則固異國

之君或為寄公則亦服斬乎

母為嗣君斬此魏晉故事非周公之禮也凡在一國之內而為親屬者無論男女皆服斬則母亦在無論男女之中與羣臣同斬恐不然正統之尊見於本宗服圖五屬本於正統乎正統本於五屬乎然則本支之序亂矣母為臣子臣母而大倫不亂乎不絕則無斬須細思之君臣之服不絕則服本服服本服者亦斬乎

左右陰陽說

天道尚左地道尚右陰陽之義也

言言卷之四十九
朝廷之禮以東為上祠廟之禮以西為上

葬用玄纁玄為陰纁為陽地道主陰故玄在右
纁在左

親耕議

月令曰反執爵于太寢三公九卿諸侯大夫皆
御命曰勞酒註曰士賤不與耕故不與勞酒之
賜也

耕則王一壻三公九卿諸侯大夫各三其上庶
民終于子畝燕則王饗太牢班嘗之庶民終食
下之所以奉上上之所以禮下有節有儀禮數

不亂然後可謂禮成此禮既見於禮經又載於五禮儀我先王已行之禮不可闕也大夫以上與耕者與燕則與正至百官之會不同時之有豐儉亦非所論也

正至之會固國之大禮今廢而不舉遠矣然親耕勞酒之禮特曠世盛儀亦非正至之比不可以正至廢禮均視而不舉也

大甸者千畝既終上帥公卿大夫親行農之禮也此禮不舉則禮無終禮無終則禮不成事體不可此數者因一時失禮後世以為禮式則

恐有百代之議也。示可不舉也。更下詢于諸大臣。毋使欠闕大善也。古者使后宮藏種以其有傳類蕃孳之祥也。王制曰：上春內宰詔王后帥六宮之人生種。種之種而獻之于王。註曰：示能育之，使不傷敗，以佐王供郊禘也。又曰：王祗設監農，不易。註曰：祗敬也。王齊戒，後除也不易。不易物土之宜也。月令曰：王命田畯相丘陵阪險原隰土地所宜，五穀所殖，以教道民，必躬親之。五穀所殖，若黍之利高燥，稌之利下濕之類也。古禮后率六宮之人生種種之種，以獻之於王。

註曰先種後熟為種後種先熟為種宋齊古事
千畝之內種赤梁白穀大豆赤黍小豆黑粳麻
子大麥小麥今禮曹定式親耕之田以九穀雜
種一畝不知何據如此非所以供郊禘之道也
百穀失早晚之時種殖之宜則不殖必如禮經
審物土之宜早晚之時以奉盡敬神明必誠必
信之道也

親蠶議

親蠶之禮月令曰季春之月天子乃薦鞠衣于
先帝註曰黃桑之服色如鞠塵象桑葉始生者

言卷三
先帝先代木德之君薦鞠衣以祈蠶事

后妃齋戒親東鄉躬桑註曰躬桑親自采桑也
蠶事既登分繭稱繅效功以供郊廟之服毋有
敢惰

王制曰中春后帥內外命婦始蠶于北郊以為

祭服

北郊有公桑蠶室

古者天子諸侯必有公桑蠶室

大昕之朝君以皮弁素積卜三宫夫人世婦之
吉者使入蠶于蠶室

既卒蠶奉繭以示于君遂獻繭于夫人夫人副
褱而受之因小牢而禮之

及良日夫人繅三盆手遂布于三宫夫人世婦之吉者朱綵之玄黃之以為黼黻文章服成君服以祀先公敬之至也

神農之法曰丈夫丁壯而不耕天下有受其飢者婦人當年而不織天下有受其寒者故身自耕妻親織以為天下先也

親蠶之禮蓋莫大焉實與親耕之禮一體而本朝亦有公桑蠶室而親蠶之禮不傳亦不載於五禮儀不敢率爾講定更詢于諸大臣召致中外博學知禮之士廣詢施行臣意如此伏惟

上裁

言言卷之四十六

論咸興本宮 四王 太祖享祀事

臣在田野最後得見朝報因禮曹判書睦來善
所啓諫院有爭論之事此享先王之禮國之
大事事莫重焉而終無下詢大臣之事臣竊
未知其故也稽之祭法嚳序星辰堯均刑法舜
勤衆事而野死契為司徒而教成稷殖百穀湯
以寬代虐文王以文治武王以武功有高辛廟
有堯祠契之商所封之邑舜之南疑巡狩之國
稷之廟左階有金人之銘者是也羽山禹修鯀

之功也。亳湯德之所自也。岐太王之荒文王之
康也。皆列於祀典。四代之所禋祀。不係於郊禘。
禘有時而止。祠無窮。今咸興本宮之祭舊遠。未
知何自始也。太祖建國立制。功烈施於百代。
固不可言也。四王實王跡所起之祖。猶西周
太王之肇基王跡。王季歷其勤王家。祭於其國。
禮之不可闕者。禮所謂祀。享不出其國。百代不
毀者也。禮式不立。內司供祀事。內司卜吏掌奠
獻祀事。不嚴非所以享。先王之道也。亦不足
為法於百王。恐為後世之譏也。鬼神之理甚微。

享之則格禱焉則應久則不散謂之非禮之禮而毀之則不可祀則當立肆獻灌享先王之祀也不當祀而祀諂也當祀而不祀怠也祀而不以禮無祀也古者告祝之詞曰來格來享降福無疆報享之禮顧不重耶惟殿下下禮官博考古先王之禮定祀式立祠名置祠官大祀以光大先王之孝實帝王之盛節也臣老廢田野冒瀆天威妄論大禮死罪死罪

禮二

五服通考序

廣平申使君專示五服通考九卷自本宗服以至三殤三父八母外親出繼出嫁妻為夫黨妾為主族君為臣臣為君君之宗族為君服又五服之外五世袒免同爨師友官師舉主改葬其服三十一廣平前代司寇公所著者也博覽崇禮可謂百代之書此書不出藏於家至今四世六十年老人恨得見之晚也今將刊行問於老人欲一言叙其事此何可已也老人雖甚耄敢不諾昔夏殷之禮孔子時已不具不足徵於杞宋而成周之禮亦周衰大壞然遺文猶在至秦

則又焚滅無餘漢興稍求亡書自高堂生後有
王史氏后倉大戴小戴所傳述浸備莽時劉歆
立周官經其後杜子春鄭興鄭玄王肅于賈之
徒作周官詁解傳授諸經註疏又如貞觀開元
之禮通典會典宋制五賢人禮說朱子家禮諸
書大傳所謂經文雖缺必有待於後人者信矣
威儀三百禮儀三千且莫重於送終哀死之節
若喪服之重親尊尊長長之序男女之別人
道之大者歷代沿革得失尤詳甚善甚善禮有
尊卑輕重厭降隆殺之節焉無此則亂矣道之

汙隆世之治亂係焉禮治則治禮亂則亂禮亡則亡此之謂也顧不重歟雖有博古好禮之士禮書汙漫又雜出於傳記不能遍觀而盡識且禮廢久矣無所考證今此之書既博考通覽編數無遺上自天子諸侯寄公舊君以及卿大夫士庶人之禮盡矣故稱之曰百代之書重光作噩嘉月上弦夕孔巖許穆序

言言卷之四十九

四十九

記言卷之四十九終

記言卷之五十 續集

學一

進心學圖

臣病中每見 經筵諸臣必問 聖學日就心
忻然喜之私自語有君如此何患國之不治此
輔弼者之責也及臣獲侍 經筵 聖德夙成
臣實忻慶臣雖至老死安敢不樂告以所學哉
謹作心學圖堯舜禹傳授心法圖以 進庶幾
有補於 聖學之萬一云

上之元年三月 日臣穆誠惶誠恐頓首頓首

言言卷之五

心學圖

人生而靜

靜

寂然無欲

無欲故虛 心不可有事

虛

喜怒哀樂未發之中 天下之大本

虛故明

明 明無不照

明故能通

通

虛靈 具衆理 心之體

心

不昧 應萬事 心之用

感而遂通

動

人之理直

直

喜怒哀樂發而皆中節之和 天下之達道

直故公

公

公故溥

溥

溥博無疆 聖人之德

事物未交知覺未萌此心虛明寂然無物及心
與物交知覺自生

人生而靜靜故此心虛明至於無所不通人之
理直直故公至於大而無窮

故曰靜虛則明明則通動直則公公則溥明通
公溥心學之大要

此特舉其學術成效次第其持守之方莫切於
堯舜禹傳授心法十六言

堯舜禹傳授心法圖

發於形氣之私

物欲難公而
易私故危

人心

惟危

心之一箇知

覺天理人欲

同行而異情

道心

發於義理之正

惟微

義理難明而
易昧故微

精而察之

惟精

不雜形氣之
私

一而守之

惟一

純乎義理之
正

危者安

微者著

動靜云為自無過不

允執厥中

及之維信執其中

程子曰聖人心法無以易此如擇善固執擇善惟精也固執惟一也

又如擇乎中庸得一善則拳拳服膺而勿失之是惟一也

又如博學審問慎思明辨省惟精也如篤行惟一也

至如明善惟精也誠身惟一也

大學格物致知惟精也誠意正心惟一也學所以學此者也孟子之後失其傳所以失此者也

為學之序

心之體本虛其理則實感通無窮皆實理虛者
實之體實者虛之用事物未交知覺未萌此心
虛明寂然無物及心與物交知覺自生物格知
至意誠心正省心之良能也由是而推之流行
不窮者道也自修身以至家齊國治天下平皆
一理心與物相感物理自明者誠也誠非敬不
存敬非誠不立敬主一一則定心法莫善於定
定則靜靜則安安則慮慮則得泉之涓涓火之
熖熖自然之序可見為學之序亦然故曰序不
可亂功不可闕天地無為而行化育聖人無私

而贊化育聖人無欲故無私學至於無欲則大
大則化化則神神則不可知

學二

易學傳授

松墩隱者務安縣松丘里人尹挺字宇天授者
也縵衣蓬戶蔬食不厭絕跡不與人來往讀易
不出七十八年而死今讀其遺文通變無窮之
妙極於無兆無朕而盡矣

隱者死之後有其家子孫云隱者守貞老人之
子也老人八十四歲翁尹濟者也隱者生於鄭

氏死阿山十年之後蓋不及門者也初守貞老人聞易數於鄭氏老人八十四死而習其數不以語人亦不以示人老而傳於其子其數自庖羲氏畫卦之本推之一而二二而四四而八以至六十四三百八十四近而一身之微遠而六合之外剛柔清濁日月晝夜寒暑往來盈虛消長氣化之分物類之羣吉凶悔吝於是焉見矣其大數自三百六十變為十二萬九千六百天地一十二會小運改矣再變為六百十七億九千六百一十六萬而三變為二萬八千二百一

十一兆九百九十萬七千四百五十六億天地
之大化窮矣馮馮翼翼無兆無朕之本是也窮
則變變則生生生不窮又有洪範筮法祖述九
峯有稽疑八十一章重光作噩朝月大暑節眉
叟著

先生生於西韓海上慕古人之學遊京師博讀
聖人賢人書既篤信好禮講學不倦可謂豪傑
之士也又如河圖之數洛書之文八卦之變九
疇之叙先天之本後天之用與夫周天度數日
月運行寒暑代序星辰躔次無所不究其未得

之也潛心積慮至發憤忘寢食久而後乃通無
一物不自得於心者自號曰困齋謂困而得之
者也其文可謂崇論博識為百代之書遠近爭
師之

校正經書義以後事詳下篇世變

己丑之獄先生死於窮北其門人受業者皆被
罪至今百年餘禍未已至毀其祠諸學子尊先
生者一一抵罪禁錮者四百有守貞老人得先
生理數藏其書諱其讀傳於松墩隱者隱者無
弟子亦自隱無名不見於世莫有知者惟南

中善行羅祐尊事之

寬齋諱大清字義仲先生次弟而少先生三歲
亦博學多通一時稱伯仲云先生死之後十二
年悲痛如一日

其歿也戒其子曰我死殮不用吉服祭不用魚
肉一如生時之處七十二歿南方士為先生立
祠其鄉以叟配食

叟死之後子敏興仕為縣監

上方悔之傳曰大清痛兄非命其兄死之十三
年槁枯自滅今收用其子意蓋為此掌令趙縝

言言卷之五十一

韓罷職續韓澈諸客論敏與者也

記言卷之五十一終

記言卷之五十一

續集

論事一

仍疏決進言

七月五日 上遣承旨 宣諭八侍疏決既罷
進曰 上爲百姓問旱禱雨殆無所不用其極
哀憐冤枉 親臨疏決非止一二至此蓋無以
加矣 上心至誠感天而已也自古有一念之
謬一事之失或召灾招咎亦有一事之美一言
之善或消灾息妖天人一理誠意相感捷於影
響此理不可誣也君臣上下皆以獲戾自飭天

言卷之五十一
道可冀也

因灾異請寬赦骨肉對

旱旣太甚田禾大無民命迫矣 殿下凡禱祀
天地山川百神牲幣之禮畢舉哀問冤枉親決
囚徒所以為百姓者殆無所不用其極而天道
之應漠然又詢問羣臣令各言其所欲言者
聖德至矣無以加矣今當下詢當盡言無隱世
龍之妻罪雖犯逞 孝廟寬之貸以不死禁不
通私親近三十年今失其性不知人理云許令
任便居住得終其天年聖德事也積愆其犯罪

固不收論臣嘗讀周官經司寇職麗邦法有八
辟其一曰議親之辟鄭玄曰親者若今時宗室
也有罪先請是也王之親族不可與衆人同例
有罪則議之所以教天下之愛親族也慮囚太
惠也寬赦及於衆庶而宗室之親不與焉恩澤
溥博疎遠畢達而仁愛不逮親近何也恐爲聖
德之累况臣職在大臣之後不敢不啓上曰當此大旱
慮囚之日凡于罪囚皆蒙赦宥獨世龍妻久在
幽囚之中渠雖犯逆孝廟旣待以不死先
王亦欲放釋而未果矣今則渠又爲廢疾之人
特為放釋上又曰積梗等以骨肉至親異於
他人雖有所犯重大罪罰旣行久竄邈方心所
不忍慈殿亦有惻然欲赦之意特為放釋

論朴憲劄

伏以朴憲事臣既略陳於疏決之日矣卽見朝報因禁府啓目有嚴問之教臣不覺駭然而驚憲本草茅卑賤敢以間里之語上瀾天聽語犯慈聖憲罪固罔赦二三公子出入浸潤之說故令或由於宦寺之說雖憲慌怯不擇而發實非憲做出之言以此罪憲憲亦冤矣憲以言事得罪其言之愚妄固不足言殿下臨御以來無此事臣竊惜之臣雖老悖豈有一毫右瀕而負殿下哉取進止

前日疏決時領中樞鄭僉和首發此

事余亦因陳寬釋之意金壽恒
上劄曰合辭請釋云者是也

論事二

論政弊劄

伏以臣聞禍伏於無形變生於不戒智者察於
幾微明者見於未萌故聖人安不忘危治不忘
亂守要害選勇猛修器械務畜積此固謀臣智
士所宜竭力勞心以備不虞之計而亦聖王所
以不遑暇食以為億萬無窮之計者也然臣以
為今日之務保民為急飢饉荐臻百姓流離大
命迫矣朝廷憂恤百姓殆無所不用其極而內

則政令不一民不信法外則官吏慢法澤不下
究又中外多事都案五家紙牌築城諸要害一
時並作民不堪命四方騷然雖良法義政民散
則可憂况弊先於法怨咨盈路行不慎始成事
不諫惟築城猶可姑緩寬民慰民惠澤不細
殿下初即位雖深山窮谷愚夫愚婦亦莫不忻
然悅之以為太平可待而即今人心散亂朝不
保夕視國法如怨讐以如此之人心如此之國
勢妄意天下之功不顧國家之大患將殺人亡
國而有不戒者臣未知大計必如此也太白書

見白虹貫日冬月天地閉塞虹霓發見雷鳴地震昏霧四塞白日無光此亦非治平之影也政亂民散亡國隨之氣數相感自古通患有國之大戒不此之慮而輕論國之大事臣竊憂之固國莫如人和人和既失雖有層城百雉積儲蓄萬闔士如林終無益於勝敗之數也古昔聖王之治養民為先養民則民安民安則國安國安則教立法行而民不肯民不肯則信孚信孚則天地應之鬼神佑之

論配享臣劄

言言卷之五
伏以臣前上劄言鄭太和事 上教嚴重臣恐
懼躋伏以待罪吏曹判書臣熙上䟽朝報中見
上䟽大槩而已及見其䟽本其語意實詆斥臣
言臣言纔畢遽有此䟽臣罪益大其䟽曰時烈
發四種期年之說太和一言揮之使時烈不敢
以此為言又曰體而不正之說已不得行此言
恐不然太和一則恐忤於時烈一則恐得罪於
公議引大明律九族圖長子衆子期年之說假
名國制以彌縫之從時烈降殺之制邦君三年
之制遂不舉今熙以為賴太和一言揮之體而

不正之說已不得行然則尹善道所爭論者何
事也趙綱所謂善道為孝廟左袒云者何事
也善道幽囚窮髮之北十年卒窮死海島者何
事也綱削其職黜之者何事也卒之仁宣太
妃之喪降從衆子期年之服何事也先王之
所釐正者亦何事也如其言則此無先王也
無殿下也無朝廷也無一世也可謂寒心一
從國制專聽於太和則太和已死久矣時烈無
誤禮之罪賓廳之議自正自此朝廷之事大變
是者非非者是有罪者無罪無罪者有罪先

王之覺悟釐正者徒為無益之空言虛文國之大患無窮雖物論無權人之心固已明矣是是非非善善惡惡天理之正在人心而發者物論也人君其尊如天其勢如地其威德如春生秋殺億兆之戴之也如神明天下之大四海之衆莫之敢抗者人君也然猶獨不勝者物論也物論可畏也熙乃敢蔑一世之物論以欺 殿下之明也耶臣積疾沉綿年齒已窮朝夕顛溝壑甘受大罪死無所憾伏乞 聖明罷臣職治臣罪以謝人言取 進止

答希仲書

已未

希仲常大言魯山事尹舜舉嘗作魯陵誌希仲乃言於王堂精寫以進亦請於上特祭魯陵欲復位張本也又致書於我欲上劄言之我以為不可復書以不從之意

世道大變上下無紀天理晦塞人心散亂兵氣太盛妖祥物恠聽聞寒心在朝者當盡言之時所示文字愚意則不然頃年作成三問廟於湖西僕聞之私自語以為當時六臣事固是非之所不到而立廟則不可況此事何事也此言何

言也直欲掩耳而不願聞也昔陳司敗問昭公知禮孔子曰知禮言君之過與諫君之過不同以此推之此義可明更思之甚善亦有一言復貞陵事與此事體一也先王之教置太宗於何地者此也雖善為辭說以有過之言引無過之君未知其善也不宣已未正月既望

希仲又以書責我我不答作上議以待訶此臣子所不敢言者也鑄嘗以此事貽書於臣亦勸臣上劄臣答以大不可之意曰直欲掩耳而不願聞也萬一事得施行上告太廟頒教

八方則臣未知慙德之所歸也臣為君隱子為父隱尊君親親萬古通義也故春秋孔子諱魯先君之過而今鑄直欲正先王之事臣以為非孔子之教也諫不聽而去箕子猶以為彰其君之過况此事何事也此言何言也臣而不為君隱子而不為父隱尊者不為尊親者不為親人之理亂矣伏惟上裁

進君德箴劄子

此專言時事政弊以及妖孽小人之灾

伏以方今治道不張百姓怨咨灾異孔棘積怨生灾積灾成禍人心之悅豫怨咨天道之吉祥

妖孽一氣而相感不同耳天道人事之相感如
影響相徒氣同則會聲比則應美事召美類惡
事召惡類自然之理也君子之與吉祥類也小
人之與妖孽類也君子進而國治小人用而國
亂故國將興美祥先見國將亡妖孽先見近來
人心世變妖孽上之所知也此君子之應耶
小人之應耶周以委靡亡秦以富强亡為惡不
同而亡國則一也此亦人君所當戒者也禮壞
法亡而東周不振強暴無道而秦以滅亡亡國
之故皆本於君德之不戒恬於宴私悅於安佚

浸潤之譖膚受之愬潛萌於狎近私昵而不自覺也可不戒哉君為四方之表君德正則四方正故曰堯舜帥天下以仁民從之此之謂也惟殿下日嚴祗敬警戒豫怠嚴宮禁戒戚屬毋使便嬖害德辨邪正公好惡毋使讒慝害正此治道之序也進賢退邪治道既張則人心大悅天道大順妖孽消亡吉祥應之善績廣而姦邪不作矣今臣老矣扶舁入國感冒沉綿今五十餘日耳聾眼眊行則喘急氣力全亡不敢側近天威惟耿耿孤衷不滅冒進瞽說拜手稽首獻

言卷之三
君德箴凡三十一句一百三十六字惟 殿下

以此加勉 聖德取進止 其箴曰

天無常親克敬惟親民無常懷懷于克仁鬼神
無常享享于克誠執德惟健臨下克明德惟治
否德亡德之積來百祥否德之積來百殃敬天
之戒毋作戲豫敬天之渝毋好佚遊日嚴祗懼
警戒勿惰毋私寵以受侮毋匿過以澤非以德
求德以彰有常讒諛多類邪巧多方不畏不戒
其害必大去讒遠佞以正官治以遺子孫萬世

論執政劄

上初登至尊首正邦禮罪人既黜人心悅服四方想望數年來治道壞亡百姓失望怨咨隨起此何也教亡政亂朝廷大壞無法無紀捐廉恥棄禮義貪欲無厭人之理蓋極亂矣廢事潰裂人各異心立黨相攻白黑混淆流言相謗至誣上行私而不可止也此皆亡國之治國無畜猶以為國不為國况無法無紀而能為國乎臣聞國之治亂在人賢良進則善績興而治道成小人用則庶政亂而灾害生考之歷代興國亡國一一皆然自古亡國之君誰不欲任用忠良長

久治安為子孫萬世計也所謂忠者非忠所謂
計者非計也巧言似信讒言似忠姦邪日進良
善日踈國事日非卒至於身亡國敗而不自覺
也忠言逆耳便佞易悅雖有明哲之君或不得
免焉此聖人所以畏巧言令色孔壬者也上
自以冲年嗣服卑謙克讓凡國之大事細事必
先問舊臣聽用不疑此固善矣今領議政許積
先王之所顧托上之所親信如齊桓之於管
仲一則仲父二則仲父既任大責重權位既盛
締交戚里以為形勢宦寺貴近結為密客伺

上動靜以為迎合有相門內官之譏勸興作深山險阻城壘萬杵百姓苦之而以勤事感上意以專權力其庶孽子堅所為多無狀國人所共知掌邦法者莫之禁因南九萬之䟽事始發覺而專掩匿覆蓋九萬竄堅卒無事人心益不快反目畏惡嗜利趨勢之徒布列內外門庭如市賂遺相屬於道路其所深者貴戚宦寺所親者讒諂面諛上得此人行此術欲與之謀國望治難矣彼入相於時烈時與之相善每論事無一違貳其所指者當時耳目不可誣及時烈

敗後付合公議若初無苟同者然及告廟之

議起見外戚貴家多陰厚罪人者乃曰此禮若
行則從有難處之事節節而起沮抑不行大義
所重在宗廟乎在時烈乎事之難處者果何
事也江都賊書既出人心危疑事變叵測而又
即不上聞何也方今上下無紀人心散亂國事
危疑甚於前日及變生禍至雖有聖人不能為
之謀矣彼得君不為不專行國政不為不久而
朝廷大潰天理晦塞君臣之義亂矣捐廉棄恥
貪欲無厭欺誣成風特其細故耳臣不敢知當

誰任其咎屋大柱小當受其敗易曰鼎折足覆
公餗其形渥凶此之謂也生民困窮飢饉加之
至父子不相保天道示警妖孽百出天地失常
陰陽不和見於災異者無非人事召之也日者
衆陽之長人君之表君不修道日失其度晡昧
無光各有云為日初出其法率於女謁日出後
近臣亂政日中大臣欺誣又曰大臣用事乘權
藉勢羽翼陰附者使毀譽乖反是非熒惑厥咎
日月無光雪霜夏隕列星失行皆大臣之咎大
臣之職揔百官平庶政撫百姓經邦國豈但貴

其身富其家大其勢酬其所德報其所怨以足
其意欲而已也惟 殿下察之臣老矣荷 聖
明優老聖德得反身鄉閭今一年復入脩門世
道之變人事之亂至此又極矣又自今過一年
二年則當更作何狀世道人心也人心一散則
難合天命係焉臣竊憂之此在 殿下正心以
及家邦嚴官禁杜私門辨賢邪正朝廷顯善威
惡使良善勸而小人懼興廉勉恥以帥四方君
德幸甚邦國幸甚

劄既上 嚴批下朝廷震動更上劄請罪

上下聽人指嗾令之首實之教

沮毀用事古人所戒臣固知一言出口禍必隨之而目見朝廷潰裂已陷危亡今當辭訣冒陳不隱聖批嚴重惶恐隕越不知所出臣之此言國人所共言雖當誅滅推委他人以求自免臣死不為此伏乞下臣司敗以治臣罪席藁請命不知所云

即出國門未及郊外右相熙白上竄朝士
四人權大載光州權璫清道李鳳徵靈光李
沃定州沃前年竄龍川今赦還繞數日得罪

者皆不知得罪事何事後以冬月雷震赦之

治道一

春秋之義勉學子

春秋之書首言大一統以明仁義之道尊君卑
臣行王道正人紀褒善糾邪使亂臣賊子禁其
姦而不得肆春秋之教也為人臣不忠不嚴朋
黨比周悖道蔑法以遂其私春秋之禁也弑君
亡國皆出於此於是有天討天誅御世正治莫
善於春秋知春秋之義然後嚴君仁親之理得
天道人事各有順正寒暑序風雨時妖孽不作

易之化禮之則樂之和詩之風書之政春秋之
義皆聖人之用而春秋者禮義之大宗也

進君德之戒劄

伏以臣以不才叨荷 大恩光寵逾分感激
殊眷益勉竭忠報德年壽已窮精力耄亡徒一
心眷眷不知所為也每經筵進講 天威不遠
顏咫尺欽仰聖學日就退而與諸臣私相語中
心喜悅夜而不寐謹著君德之戒二篇數百餘
言以進言雖鄙拙亦或有補於修德之萬一云
君德之戒上篇百有十七言

德莫善於克一治莫善於保民政莫善於戡亂
業莫善於立極聖人勉之

德衰於逸欲治衰於諛佞政衰於私昵業衰於
怠荒聖人戒之

德衰則禮壞治衰則民散政衰則國弊業衰則
國亡聖人懼之

聖人為之父子君臣以立紀綱以定天下有父
不父子不子君不君臣不臣紀綱乃亡邦國乃
亂聖人憂之

君德之戒下篇百有九言

玩人者喪德玩物者喪志成德見於行善政見於事顯善威惡政法之大經明慎克勤思不失先王之謨訓

撙攬權綱重勢在上令人知畏法以禁絕其邪心思不墜先王之大業

斥浮妄勉忠信嚴威屬戒逸豫有言遜于所好必察於私枉有言逆于所欲必察於公正以承億萬無疆之休

答曰省䟽具悉卿懇別紙戒誨之辭無非憂愛之衷惻予雖不敏可不置諸左右而服膺焉

記言卷之五十一終

記言卷之五十二 續集

治道二

進德禮政刑罰

伏以臣庸下無一才能學術性篤好詩書六藝
之文至今行年八十卒無所得猶說讀如初蒙
荷 聖德寵擢異等臣感激 殊遇無以報答
大恩歷述虞夏殷周之格言謨訓作德禮政刑
七百餘言

曰德衆善之聚天地之正理在心為德在事為
義執德行義人道之大經太甲之訓曰奉先思

孝接下思恭視遠惟明聽德惟聰君德之首也
德惟治否德亂與治同道罔不興與亂同事罔
不亡終始慎厥與惟明明后益戒禹曰儆戒無
虞罔違道以干百姓之譽罔拂百姓以從己之
欲君德明於上百職修於下黎民悅於四方於
是風雨調寒暑時五穀穰熟民無疾疫天札盛
德之治也故曰惟吉凶不僭在人惟天降灾祥
以德

曰禮君君臣臣父父子子之倫非禮不叙尊卑
貴賤隆殺之品非禮不秩禮之天叙天秩者也

行之於身自視聽言動修身制行以至嚴等威
定親疎別異同決嫌疑明是非皆主於禮禮不
可亂故曰家國天下禮治則治禮亂則亂禮亡
則亡故曰壞國亡家喪人先去其禮傳曰禮始
於冠本於婚重於喪祭尊於朝聘和於燕射禮
之大體也

曰政陶唐氏曆象日月星辰虞舜氏齊七政之
運行所以授民時成歲功者也為政在安民安
民莫先於知人知人則哲能官人不以檢人故
說戒武丁曰官不及私昵爵不及惡德故莫不

以克明峻德而興亦莫不以羞刑廢習而亡語
曰臨之以莊則敬孝慈則忠舉善教不能則勸
故曰作新民為政以先則不令而行上好禮則
民莫敢不敬上好義則民莫敢不服上好信則
民莫敢不用情比小事大師律九伐之威食地
役民三等皆屬於政

德衰於逸欲政衰於私昵詩曰靡不有初鮮克
有終故太甲之訓曰慎終于始德昏則政亂政
亂則民散德昏政亂民散而國以治安者未之
有也

曰刑禮以教之政以齊之刑以一之刑亦未也
然雖上古之治非制刑無以止亂禁暴周典曰
刑新國用輕典刑平國用中典刑亂國用重典
故罰世重世輕世治則其罰輕世亂則其罰重
罰有經有權紂殘虐之治而其亡也獄囚自出
王者之治以不殺為德陵夷無禁亡國之治也
虞舜制刑宥過無大刑故無小亦不可謂不嚴
也周官之治寇賊劫略攘奪矯虔偽行澤非疑
衆亂俗皆斷於司寇王者之治戒無殘虐而已
未有為國不嚴而國不亡者也

此四代之治其體要畢舉以備工師之諷誦惟朝夕左右深思而力行之庶幾有補於君德治道之萬一云

復推言德禮政刑再上劄

伏以 殿下嗣受丕基人心無有遠邇深山窮谷愚夫愚婦莫不懽忻拭目相望思見德化之成而上天垂象氛祲示警日月告凶天之將仁愛 殿下有所責勵而加勉者耶抑安知或有人為感之而禍亂潛萌卒以成大咎者至此耶其示警一也臣既上德禮政刑之戒而仍請推

言其義復申戒於 殿下此老臣將死之言也
德者得也萬善得於心者也德必一於誠實無
一毫私偽間之而流通事為之際在吾修身制
行近而自居室之微遠而至於四方千里之外
無不怡悅誠服而天道應之也然明德貴於審
幾苟幾之不審敗德之愆危身之行切近之咎
有親蹈而不覺者綿綿不戒至於禍大而不救
者甚可懼也

禮者人事之則而行於彝倫日用之常聖人以
禮制行以義制事此禮義之大經禮貴正名苟

言言卷之三
禮壞名亂而有君不君臣不臣父不父子不子
而國以治安者未之有也故齊景公曰君不君
臣不臣父不父子不子雖有粟吾得以食諸此
壞禮亂名之大戒也

政者正也正人之不正者也善政本於善行安
民本於知人所畏巧言令色孔壬聖人必先禮
讓信義而責民之忠敬悅服而用其情也政成
於公敗於私一於是貳於非公私不可與苟循
是非不可與苟合此治亂之兆興亡之機也可
不戒哉

法者禮之通刑者法之用禮無法則不行刑無法則不中法有經有權刑有重有輕法出於仁成於公者也聖人之大用重罪輕法者無法也輕罪重法者無義也無法無義大亂之治也

方今之治德禮政刑皆亂矣天下之道在至誠天地以至誠成化育聖人以至誠贊化育人君體天理物必以至誠先德禮政刑自修身慎行以至家國之治德必修禮必治政必成刑必中以為治平之業人君之德不私其身以四方百姓為心不私其法以祖宗萬世為憲不私其

臣以守正循國為賢滅德壞法亡國一歸於私
禎祥妖孽治亂之兆人事之影古人曰不見其
形願察其影此殿下以身畏忌修德興國之
圖其幾恐不在於輕宥薄罰徒為應文之具而
已也惟聖明加勉焉

上古文十一銘劄

伏以殿下既三年喪畢冕祀先王於太
廟受羣臣賀推廣恩澤雜犯死罪者皆赦之
臣民懽忻同慶欽仰政化一新人君惟萬國之
表中心無為以守至正禮三公在朝以教訓德

義保其身體三老在學以憲德之言在與有旅
賁之規位宁有官師之典倚几有誦訓之諫居
寢有誓御之箴宴居有工師之誦臨朝有誓史
之道非辟之干無自以入君德之所以自養者
亦必奸聲亂色不留聰明淫樂慝禮不接心術
外無聲色之誘內無淫慝之惑內外交養惰慢
邪辟之氣不設於其身心志百體皆由順正親
仁好問克勤不怠以成至德天人合應治道大
順祥瑞畢至惟 殿下加勉焉昔周武王既克
殷踐祚三日受丹書之戒於師尚父惕若戒懼

言言卷之三
矛鈎几杖居處器皿皆有銘凡十一篇今臣敢
以古文書進此三代之訓三代之文三代之禮
殿下常目在之以義制事以禮制心遵而勿失
聖德幸甚邦國幸甚

辭受

辭月廩疏

伏以狗馬賤疾不圖上徹天聽至使太醫視
疾聖慮勤切寵賜絡繹此天地之仁臣感
激恩私縻粉刻骨無以報答萬一仰首垂涕
不知所云臣前月拜命之初上恤臣羈旅

之艱 特令有司繼給米饌薪炭今臣已有常
受祿俸自奉已足而又受此餘外之 賜恩私
太盛於臣身光寵溢尤臣是何人敢當此事臣
聞君使臣以禮臣事君以忠伏乞 聖明亟收
成命以禮勉臣臣以忠報 殿下君臣相勉之
道也臣所望於 聖明者夙夜圖惟艱大之業
懋修大德不愆不怠上而承 先王之遺下而
副億萬蒼生之望邦國幸甚臣無任惶悚隕越
之至

再辭疏

伏以臣以不才濫蒙誤恩一歲中三遷其官
位齊上卿兼掌學教之職榮寵太盛而顧無一
報效面赧心愧不知所出其中尤有所不敢當
者君食臣有禮臣食君有義忠信重祿萬鍾有
不辭至庖人繼肉廩人繼粟非賓師無此禮臣
初非有聘幣之招而本圻內之民感激殊遇
思以竭忠報殿下臣既有常祿自足而又有
庖廩之饋實非禮之物臣既嘗累陳不敢當之
義而未蒙允許義不可兩受辭常祿而不受
於禮於義皆不可伏乞聖明察臣危懇許收

庖廩之饋上無過禮之賜臣無僭分之受食常祿以安分義事體大善也臣無任戰怖隕越之至

三辭疏

伏以臣蒙荷 恩寵得閑暇江湖十里烟沙遠
出長江皆可娛心適意臣無事頌祝 聖人因
此得所而長逝無他願也臣既與在位時不同
與漁夫野老為伍而仍受庖廩之饋 賜與受
皆非禮也伏乞 聖慈恕臣昏耄 命有司收
月廩之賜以安微分國體幸甚君臣之禮幸甚

取進止

論執政忤上旨辭月廩劄

伏以臣不忠獲戾于殿下退伏田廬日俟重
誅而郡邑餽廩之饋自若事體大謬例受常祿
猶恐懼不敢受此物何為而至於臣哉臣雖無
恥安敢自處與無罪者同而恬然食厚養而不
辭以重罪戾也臣決不敢受此不敢當之賜以
負殿下重為朝廷羞也臣負罪之中固知不
敢上劄而恐無以暴白下情冒萬死重犯瀆擾
死罪死罪伏乞亟收成命令負罪者得安分願

臣死不愧怍也取進止

辭食物劄

伏以臣荷殿下仁覆之大恩幸免大罪返身
畎畝得安耕鑿日夜頌祝聖德以畢餘生足
矣萬萬夢寐之外有此無名之寵賜近侍下
臨宣諭德意殿下之仁哀憐老臣特施收恤
之盛典也然此私恩也君臣主義非義不可此
子思再拜稽首而不受者也以臣無狀久居寵
利事殿下無一報效當國事艱危沮毀倚重
之臣觸犯天威臣日俟重誅惶恐隕越不知所

言美之三二
以處之也君臣之禮甚嚴伏乞 聖明察臣危
惓特收成命以安微分臣無任死罪死罪取
進止

再上劄

伏以 殿下以不以遺年之義優老盛典及於
田野閉伏之臣至遣近侍 宣諭德意臣恐懼
請罪辭不受命臣罪益大 上不錄其罪又有
勿辭之命臣感祝 寵命寬許至此而顧竊有
所大惑者臣感激 殊遇必以古人之義事
殿下而 殿下不以古人之義臨臣此誠意未

孚稽首俟罪不知所云如月廩之賜賓師重禮
亦安敢恬然無讓不為之固辭也此辭非自今
日始也 殿下之所知也伏乞 聖明亟收成
命以安微分臣無任戰怖隕越之至死罪死罪
取進止

文學

上經說東事劄

伏以臣耄荒沉綿病積久既無用於世矣受國
大恩死無以報 殿下臣作經說二十言易春
秋詩書洪範九疇禮樂刑政時令鬼神追述虞

夏殷周古經齊魯語月令夏小正左國氏諸書
其言皆古聖人賢人之言其法術皆古聖人賢
人之法術臣八十年篤信勤學者此也企勉古
人者其義亦此也當今之時進言者皆以功利
為急臣之此書固知迂濶而不可也 殿下深
思而試用之此三代之治也臣雖在九原之下
是 殿下用臣也又作東事二十二蓋東方九
域上古立后建國大小二十二為方外別國其
書荒恠不信不實其傳後世者僅十一二山川
區別風氣不同其聲音謠俗嗜欲各異論其治

則檀君淳龐之治箕子八政之教各千年衛滿
以兵威財物拓地數千里暴得暴亡肅慎氏楮
矢石罟傳於史氏高句麗强大之治傳國七百
百濟强暴好戰其國君戰而死者四君國且滅
亡新羅忠厚之治稱仁義之邦傳國五十八世
盖列國之政善惡治亂興亡之故為後世勸戒
者非一而百濟之葆澤溉田稻之耕山歲易百
代不改歲易者田賦無當稅也總論地利物貨
禮義善俗東方舊俗其性儉嗇好禮讓大體皆
然古之人有言曰循俗而治者其民易從而

言言卷之三
偷黑齒鞮鞬其政俗傳道致物皆在我之治也
惟殿下深念而熟察之

政獎一

論戶布第二劄

臣竊觀當今之極獎軍伍物故者未除襁褓兒
在籍徵歛之弊侵及鄰族號怨無窮此事極無
據殊非聖朝不忍人之政必代定然後變通則
搜括閑丁無役者不患無人而皆屬衙門變通
無期愁痛無已時此豈治安之術也亟罷之以
慰人心戶布之弊臣既略陳於前劄而又有大

不便者三其一公卿大夫士與編戶齊民各計
戶出布以代軍布納之兵曹事體紊亂非先
王忠信重祿體羣臣之意也邦國維持而不亂
者禮義也禮義既亡雖有閭士如林積貨如山
不足恃也其二前榜萬人出身其本雖賤賤居
半既以出身為名則其自處也朝廷之待之也
皆以士大夫之末一朝出布與編戶齊民等必
心怒而羣怨一時不從新法者可驅而罰之其
心不可勝也其三館學諸生等亦皆兵曹主管
計口收布一如凡民無役其心恥之亦非細故

三代之制建學立師教以詩書禮樂優待禮士之道恐不然也此法一行國體大壞人心大亂也國壞民亂而能不亡者未之有也臣以為決不可行也惟 殿下熟察之

第三劄

上命姑停其事故乃止

戶布猶周官之夫布夫布四民不與焉凡民之無職業者罰之以勸民者也今其法自朝廷百官以及閭巷匹夫文武出身未入仕者館學上亦齋生宗室功臣貴臣士族子孫業儒業武校生武學諸學生徒等皆以編戶出布聚斂無名

事理無據國勢日削兵氣太盛又以朝廷之體
下比編戶奉給鬪士徒隸上下無紀如大狃小
狃事體大壞孟子曰勞心者食於人勞力者食
人聖人設為法制尊賢親親以教天下者也今
此法一行等威紊亂傳曰禮亂則上下亂此非
細故四三年來政令煩苛民不堪命怨詈者皆
曰新法之故也新法不起於邦盛之世世衰則
法亂故叔向曰國將亡必多制此臣所大懼者
也今聞關內外自江南亂後兵食不給以編戶
出金無論貴賤老少此我戶布之制也其舊俗

貴壯而賤老上下無法此固不可以冠帶之國
法度言也見小利不顧大義聖人戒之昔公孫
鞅說秦孝公廢井田開阡陌專務富國強兵秦
舊臣多爭之卒以亡秦患生於先利而後義亡
先王之法也苟利於國衆怨縱不足恤先王之
制不可亂也一世各有一王之法百代不改軀
改舊章三代之禁也自 殷下即位來民不信
法四方騷然此何故也一二臣言功利大小靡
然和付富强之治可立致也臣恐朝廷無紀四
方愁怨亡國之禍迫矣

記言卷之五十二 續集

政弊二

論提管劄

伏以臣昨伏承 聖旨軫念垂死老臣 恩澤
至渥臣非木石安得不為之感激 殊遇思欲
以死報 殿下也臣病中得見邸報廷議欲罷
提管臣不覺却食長嘆兵典提管掌治五衛軍
務外而州府鎮管軍士皆屬五衛提管之設蓋
莫重焉癸巳 車駕還京京城殘破百司依於
牆壁歲飢盜賊多起故相柳成龍白 上選五

部丁壯教習江浙兵技號曰訓練都監分番宿衛人心乃安衙門之設始此癸亥中興之後功臣等不解兵權各立衙門於是有御營守禦扈衛總戎之名兵威甚盛總管遂輕自此體統大壞總管無益於有無今有革罷之議經國六典始於世祖六年成於成宗二年大小皆稟睿裁行之歷十世二百餘年一朝罷之自中葉以來累經變亂人心不散者皆祖宗餘業今罷先王制作雖至於虛名無實罷之事體不可臣以為衙門可罷也總管不可罷也如巡將

監軍雖最冗官事體重不可輕議也前時時
烈浚吉常言唐虞三代以為大典不可從其言
之弊可為寒心一世之治各有一王之法不患
不治臣恐自此之後又有重於此者亦必輕視
而變更無難也此非細故衙門太盛言其積弊
亦非國家之利也取進止

論宮中宿衛劄

伏以國家多事宣仁以來諸小寺減省者多
而至於王宮國都宿衛行巡警守之官不及焉
蓋責任與小寺事體不同故也本兵與總管摘

奸入直諸將士照戎器夜則先啓乃行 闕內
衛將若部將分更行巡王城內外五衛各一部
分二所行巡有巡將監軍巡將掌受牌分授巡
官之事宣傳官二人受形名宮門衛將受軍號
受鐸以此徇警至罷漏軍法之重警守之嚴職
雖小闕一則不可實非汗漫之任也取 進止

以金萬重言待罪疏

臣頃者進對 上前猥陳故臣金宗一事蓋宗
一以舊學士平生好讜直忤時烈之黨不復用
於朝臣之所陳者惜其無罪棄斥而死專指羣

小濁亂之迹昨日召對承旨金萬重以語犯
先朝所奏悖理至被 嚴旨云臣初聞之竊不
勝瞿然之至臣以昏耄之年做事獻言無一善
狀徒惹人言動遭誚詆此臣之所大懼而大愧
者也伏乞 聖慈亟治臣愾謬之罪以安人臣
之分義不勝大幸

答曰肖疏具悉卿懇再昨趁中萬重說話無非
迂還諸賢恣為護黨之計其奸巧之狀昭不可
掩誠不足掛齒卿何過辭若其太
過乎安心勿辭速出行公以副予望

再疏

臣伏讀 聖批惶悚隕越不覺感淚沾裾臣歷

事 兩朝逮至 殿下為三朝老犬馬常恐受
恩厚而報效薄日夜以得罪為懼前日進對略
陳金宗一事惜其良善擯斥死而埋沒專咎用
事者病國亂政不圖論臣者反以為語犯 先
朝為悖理此人臣大罪無所容貸而賴 殿下
明聖得免誅罰中心感激殺身不足以報答
大恩臣既受大罰惡名何敢晏然居高位食厚
祿恃 恩自若而已也伏乞 聖明治臣罪以
嚴君臣之大義不勝幸甚

答曰省疏具悉卿懇鳴呼人心世道之不淑未
有甚於近日向者為重政以悖理不近之說

意誣陷不遺餘力予甚忿駭也今觀卿疏何乃
引咎若是其邁邁耶予實慙慙不知所以為喻
卿須體予意安心勿辭
速出付公以副至意

論言貌取人疏

伏以本曹新設揀取武士之法無論有官無官
凡被薦者皆招集列坐之視其容貌聽其言語
取其可取者去其不可取者定為令式此於得
人之道可謂詳且盡矣而其弊必歸其言善其
容以為得官之蹊徑於事體有大不可者此與
擊劒騎射試取不同凡有出衆之才人固未易
知而外貌利口有足欺人中心愿慙者無所售

於世而亦必有知恥而不求自試者為朝廷羞
大矣彼雖武人其官朝廷之爵固不可輕慢而
苟授用人官人不宜如此此事既為憲令臣待
罪銓選之職於心實有所不然者蓋如此不得
不仰瀆 天聽伏乞 聖明垂擇焉

論政弊疏

伏以自 殿下初即位有志圖治召用文學首
正大義與民休息人心悅服四方想望謀國諸
臣以為千載一時各言計策於是中外多事四
方騷然紛更既多其中言兵事者其事最大其

害最深古人有言曰強國在兵亡國在兵賴

殿下聖明國家無事邊境無烟火之警而一朝
整戎卒治器械築要害人心凶凶若朝夕有變
者鄉里惡少莫不揣摩迎合上之所令下之所
趨前時耕者談農賈者談利工者談善巧各專
其業通衢大都其俗環利山峽之人櫟駭出於
性者然也今時則不然王都禮法之本而衙門
盛強養兵滿萬鬪士如林衣短後馳馬試劍者
盈城又設萬人之科此科甚無義農工商賈傭
隸走卒不操弓不識字代射代講者不可計數

先王設科取士之意豈如此哉以外方言之雖
深山谿谷少人事之鄉毋論工賈田父亦莫不
張弓矚目語難自以為得此時晚矣爭慕爵位
或一事不得意則各出氣力以爭鬪為能此屬
多萬人出身諸衙門軍官牙兵卒伍凶悍無賴
無恥自恣不屬於守令者以此推之一國之內
皆然自朝廷之本以至庶賤氓隸名分紊亂棄
禮義捐廉恥忠善畏法之風亡矣此亂國之治
也臣竊憂之屯田固兵家之利也古昔中國盛
時夷狄寇邊至於兵連禍結屯田塞上空地寇

退則耕稼積儲以省轉輸之勞寇至則入戍以
待奴之衰弱今之屯田皆在於內地膏壤墾田
屯卒日衆四方避役逃賦者皆是田賦日縮戶
口日亡至於國不為國可為寒心前朝之亡家
兵盛強國內屯田布滿列邑其弊不堪我 太
祖初定四方悉罷列邑屯田只存陰竹屯田一
處而已今屯田其害反甚於亡國之末弊此已
亡之塗轍也王城之內武衛太盛屯田漸廣邦
賦日削亦不屬於兵食本朝三百年無此事先
王之制雖治平偃武之世固安不忘危治不忘

亂有制軍糾邦之政令然兵勝則乃亂故衆仲
曰兵猶火也不伐將自焚兵者凶器聖人戒之
方今國家所急者兵事百姓怨苦者兵政度支
經費竭非利民無以生財連歲凶荒耕山不食
之田土薄歲易之地皆有常稅飢民無食者無
異剥膚前時昏亂之治亦無此事此有司之罪
也然其弊皆出於兵物故掩骼者有役布此亦
何政也此其來已久然豈無哀矜變通之術也
此特舉其太甚者云耳又其外疾首愁痛無告
難以悉舉君依於國國依於民民散則國亡故

先王之治保民為大為人上惠澤不下而望下
之人親上死長之義難矣當今之世大小潰裂
內則朝廷亂外則百姓亂百姓亂其本在朝廷
朝廷大壞士異論人異交所忌者直道敢言所
趨者形勢利害所蔑者讀書修行文武用才毋
論其人之邪正善惡多是私恩舊好姻婭親屬
或市井族種曩時昏朝之漸不過如此不圖
殿下臨御而朝廷至此也仕路污濁廉恥之士
誰肯願立於朝也國何時而不傾人心何仰而
不散灾害何弭而不並至哉雖有聖人不能為

之謀也此亡國之事也善為國者制治於未亂
弭患於未萌今已晚矣然在 殿下有國之綱
紀政法非公正不立 殿下立德無私不失公
正糾邦憲選良善嚴絀陟罷無益抑强盛母安
於姑息毋悅於便佞毋變古易俗以承 先王
艱大之遺姑息易安便佞易悅姑息衰微之治
然其禍猶遲便佞難其言順耳其色善柔乘一
念怠傲有以媒孽禍殃甚至於亡國覆宗故臯
陶之謨所畏巧言令色孔壬孔子教為邦曰遠
佞人佞人殆大可懼也自古明君誼辟能祈天

永命無他術也臣荷 殿下不世之 殊遇今
朝暮八地觀世變至此世道至此冒進瞽說不
勝惶悚隕越之至

國舅進劄後請對

國舅金佑明上劄其語意內間有間言不悅於
慈聖云某與吏曹叅議尹鐸弘文應教李夏鎮
校理權愈請對 上引見召領議政許積亦入
侍 上見某問曰卿疾何如對曰在恩澤中幸
不顛溝壑皆天地之仁恩也 上曰聞卿病重
為卿憂慮殊切今見卿予心喜悅仍問曰何以

請對對曰臣聞佑明上劄 上出示大臣而臣
不得見不可以傳聞論事請見其劄 上乃示
之仍進曰佑明疏中云云 慈聖干預國政
上不敢受命此帝王之大孝也至於朝夕奉養
之節羣臣咸仰 聖德佑明聞細人離間之言
上此劄請與佑明相見問間言者佑明必其心
憤憤盡言不諱矣 上良久乃許之令召問政
院佑明不來 上命退夕 上復召大臣諸公
卿議事兵曹判書金錫胄不進某亦已退不得
進 慈聖出御外殿 上以小屏隔之 慈聖

大聲哭良久左右驚遑失措佑明疏中又有福
昌福平二公子出入禁中私于宮女之語前夕
二公子皆被繫明日 上即釋之曰誤聽人言
使骨肉之親至此慙悔置身無所

時弊劄

伏以臣伏讀下政院 聖教大哉王言一言足
以感動天道四方遐遠孰不為之感激涕泣有
願戴之心也古今一理天地一氣氣一於中和
純正者在物為吉祥善瑞在人為忠實良善以
致治平氣一於汙濁不正者在物為災異妖孽

在人為讒賊孔壬以成禍亂同聲相應同氣相
求不可誣也 殿下臨御以來鄉曲小譽無不
畢用利民善俗無不畢舉四方悅豫太平之治
指日可期奈之何數年來甲兵滿國戈鋌相摩
城池器械凡人力可完者可謂極備而仁義禮
俗之治迂濶而不用人心爭富慕貴以為此二
時也捐廉忘恥視禮讓為何事此恐非致治之
物也方今 殿下感悟天戒博詢民瘼政獎首
罷無益之軍務損其太盛寬其苛急令百姓悅
喜甚大惠也然廟堂書啓其變通節目軍門五

營守禦牙兵八千六百減一千六百總戎牙兵
三千一百減一千四百軍門兵氣自若病民則
無改也軍門屯田積弊已數十年據國中膏壤
屯卒盛強以軍門之重郡邑不敢問無異異國
之人甚可駭也壬癸以後新設者不多不滿十
一洪川一屯又以要害不論則革罷峽中四屯
而已槩論之屯田遍國中亦不係於兵食積貨
萬萬黷貨無益田賦日削良民不堪官府之治
主客反易所謂邦分崩離析者此也可為寒心
自羣臣獻議四方日望朝廷保民之治而令下

則塞責嶺內外峽中數屯而已百姓失望怨咨
如前數年來政苛民急蓋不可勝言而公私之
害屯田十八九災不虛生積怨召災積灾召殃
此 殿下所已焦心軫恤者也方今 殿下悶
旱禱雨牲幣潔誠殆無所不用其極而山川不
應臣以為牲幣不如反省祈禱不如實惠實惠
莫先於罷屯田慰民心成國家之利益也屯卒
足以補列邑逃亡物故租入足以裕度支經費
萬數兵政簡而民不病愁怨之聲絕於閭巷矣
風雨時百穀穰熟非政和民悅不得也不及今

大革罷因循襲謬國勢日削而民散矣後雖欲
悔之無及已古人云治國富其民衰國富其大
夫亡國富其府今日之事不幸近之商鞅以刻
薄治秦雖殺人日成積於市其實富民足國無
敵於天下今以殘民之治為國家萬世利無此
理也氣化之流行今日在人者未必非忠實良
善而災異妖孽日出何也懼災圖治之政一違
於寬民利國抑何也國日削弱在屯田度支日
耗在屯田逋逃淵藪在屯田衙門專利在屯田
邦國之與衙門其輕重大小利害得失彼此之

權孰先而孰後也乞以此 下詢廟堂痛祛病
民之源以為國家長利幸甚幸甚取 進止

論政弊疏

伏以 殿下祗省 先陵災異 聖心警戒休

惕之感有不可以言語盡者也五行志陵崩與

山崩同謂之大災昔晉穆帝時峻平崇陽二陵

崩帝素服臨於太極殿三日 殿下為之祗畏

不寧立罷親耕之禮不臨朝不御經筵一如居

憂之日以待修陵禮成聖德固至矣而禮官不

舉陵崩之禮何也又咸興永興安邊大風諸陵

真殿折木拔屋之灾亦天道之警大可懼也人
事之變極於下而謫見於上君子懼焉數十年
未用事者敗國人心陷溺世道大變 殿下臨
御黜陟不嚴人不畏法朝綱政法紊亂國勢衰
弱衙門盛強武士驕橫屯田徧國中有司莫以
禁衙門之弊 上方下詢抑損善後計策而屯
田 孝廟既已罷之而衙門持之甚無義至於
今日安敢如此人心日離灾異日出 陵崩大
熒赤祥旱乾夏雪妖星十二其一彗星星家所
忌此皆人為感之也振紀綱正人心敦禮俗禁

姦止邪非公正不能人君立德無私克修公正
之德正治體嚴法制以帥怠慢修六官之職言
責者盡其言官守者盡其職然後治道可言也
臣聞善為國者制治於未亂弭患於未萌今已
晚矣然在 殿下衰國之治政多恩貸私枉滅
公無法無義人心大亂兵氣召灾禍亂已萌天
失其道則物妖犯之君失其道則灾害乘之救
時莫如賢能保民莫如善政選用良善以收人
望革弊修政以保民心上有仁聖之君下必有
賢能之佐求人不在於長短美惡心與術最善

心正術正不害為君子仁義功業善於後世也
古人曰人才不借於異代人君苟以誠意求士
不患無士以誠意保民不患民散特所患者君
心宴安之暇便嬖易乘誠意不終至於患生而
不戒禍至而不覺可不懼哉 殿下令羣臣各
言闕失進言者非不多其言可採者亦不少四
方百姓聞之皆欣欣然相慶曰 主上仁聖殆
庶幾撫我寬我今已逾月皆虛文無用無一警
動振作之治民心益散庶事益解臣恐民散已
盡禍亂已形雖欲悔之無及也衙門積弊諸臣

既備陳之矣割膏腴之壤以為屯田地部大屈
租入日耗稅於衙門者十二三而亦不為實用
餘皆屯有司之私財此財之大敗也牙兵領於
衙門兵曹不能管大萬之卒悉為私家之健役
此罷末家兵之類也屯田牙兵公室之大蠹而
私門之利也詩云木實繁者披其枝披其枝者
傷其根古人憂時之辭也昔宣廟朝相臣李
元翼為都體察使將視師吐邊病不能出上
欲開府京師元翼以為體察體上躬也以不御
之權握兵柄在朝專制事體不可辭不受命力

疾出巡此故事也軍禮推轂之命曰閫以外將軍制之方今四境無命將征討之事而寔體相開府王城以專制四方甚無謂諸臣有請罷者臣以為受任大臣必不以無名大權自居不請亦罷訓練都監及守禦御營提戎諸衙門屯田牙兵悉皆革罷田賦歸之戶部軍丁歸之兵部器械犒賞之需責之戶部逃故闕額之代責之兵部又罷新設無益之精抄則國有裕財之利兵無襁褓白骨之冤民心庶可慰矣今日之人心今日之國勢不待災異而識者寒心導民善

俗弭災致治其本在 殿下一心公正之德也
君德治道一也君德日彊治道日隆此聖人之
大用公正所臨妖枉莫犯私偽莫售離者合散
者一乖者和愁怨者悅豫四方大順也臣才智
下好善而不適時宜慕古而不識時務與俗背
馳迂濶而無用也加以昏耗衰亡朝暮八地然
安敢自疎於 殊遇之際不盡言於 殿下也
惟 殿下垂察焉臣無任戰懼隕越之至
災異

因白虹貫日進劄

伏以臣才識庸下猥荷寵擢位至三公無一報效尸位曠官坐令生民不保國勢艱危至於上千天道灾異疊見今又有白虹貫日之變人心畏之若變在朝夕此皆輔弼之罪也臣罪萬死殿下即位之初人心悅豫大小權忻皆以為太平可興也奈之何天道示警旱乾水溢百姓飢饉任事諸臣各言計策中外多事四方失望此非細患臣聞變不虛生天道難謖伏乞 聖明反身求過察於政令以為得罪於天者何事雖出於深思積慮合於機務臣愚以為獎先於事

則改之非先王之法則改之民不便則改之自
責求言察納忠猷選用良善列之庶位以代天
工先治臣欺天曠官之罪以收人心以承天警
臣無任戰怖隕越之至

論矣氣劄

伏以臣年病俱至沉綿積久閉伏亡人事縷喘
奄奄朝暮且死而一息未絕戀戀大馬之枕安
敢一日忘 殿下也夏小正曰八月水始涸雷
始收聲今秋節已盡冬月迫矣日昔大雷暴雨
發於雲霧連日之餘春秋傳曰霜露之氣不和

而散則為戾氣此戾氣也是謂暝月陽失節而陰氣縱也嚴咎陰賈陽臣侵君也臣竊未知

殿下之明聖而有天道之警至此何也此輔弼者之罪也糾之漢法臣罪當誅死無所辭伏願殿下亦反己修德不失先王之謨訓日以祗畏為心克勤不急不以細故而忽之然後天警可答人心可保也臣進修德之戒六事一定心志以靜為本心無欲則靜靜則心不妄動行不失天理之正君德日躋矣二明是非辨邪正之分諂言害公謹言無私察於公私治亂興亡於是

焉判矣三重喜怒嚴絀陟之威登明選公朝廷
肅穆國勢尊而治道不亂矣四尚忠敬率勵臣
民以身先之遐邇一德風俗淳厚矣五謹言行
一以過失為戒人君一言之過一事之失政令
壞墜人心缺望天道難諶甚可畏也六慎起居
以養動靜動靜克慎灾疹不生以至壽考康寧
為一宗社億萬無疆之慶也自古聖哲之君有
克謹不讐畏天之威反灾為祥以成中興之治
此在 殿下臣無任待罪隕越之至

因灾異乞罷劄

伏以臣昨伏見 下政院憂恤災異之教 殿
下聰明仁聖中興功烈指日可待古人曰主憂
臣辱主辱臣死如臣不才居三公位無一報效
災異疊出 殿下中朝而憂臣實死罪無所逃
遁五行志曰雨陰也雪又雨之陰也春秋傳曰
陰陽之氣不和而散則為戾氣為暄霾暄霾者
戾氣也陰脅陽也李尋曰日者衆陽之長光輝
所照萬里同晷人君之表君道不修日失其道
晡昧無光此陰盛陽微之咎輔弼之罪也既往
之咎來事之師也天心深遠難知宜察於細微

消絕萌芽辨邪正嚴黜陟罷煩急寬民力雖有
事之已遂而不可已者須善其後圖毋失四方
百姓之心以承天警民散則變生民散變生後
雖欲悔之無及也漢法以灾異責免三公臣席
橐請命不任悚懼隕越之至

記言卷之五十三終

